



隨齋紀程卷七

ル 4  
3411  
7



信 3 呂 儿  
2 7 5  
7

門 儿 4  
號 3411  
卷 7

隨鑾紀程卷七

一等編修官兼攝內閣大書記官從五位川田剛撰

秋田縣總說

秋田縣統轄羽後州八郡。南秋田。北秋田。山本。河邊。由利。仙北。平鹿。雄勝。陸

中州一郡。鹿角治於南秋田郡秋田東根小屋町。疆域北接青森縣。東隣巖手縣。東南連宮城山形二縣。西瀕大海。幅員東自仙北郡仙巖嶺。西至由利郡松崎。二十三里二十五町餘。南自雄勝郡院內嶺。北至北秋田郡矢立嶺。六十三里三十二町餘。其山脉來自



陸奧。劃斷東北。會於中央。而能代川注於北。貢川流於南。牡鹿島斗出於西。抱擁八龍湖。地味磽瘠。不宜果穀。沿海利於漁業。本縣除角鹿郡外。原為出羽州。天平寶字中。置秋田城。而州介居之。稱秋田城介。寬治中。清原武衡與從子家衡作亂。據仙北郡金澤塞。陸奧守源義家擊平之。後百餘年。鎌倉幕府奏以安達景盛為秋田城介。知州事。傳孫泰盛為執權。北條貞時所滅。應永中。安東庶季從陸奧來。據秋田城。因稱秋田氏。永享末。秋田氏小野寺氏互爭疆壤。天文

永祿間。小野寺氏漸熾。征服由利十二黨。及六鄉戶澤諸大姓。關原之役。德川氏霸天下。收小野寺義道地。分封秋田六鄉戶澤諸氏。授佐竹義宣以秋田山本雄勝河邊仙北平鹿六郡。元和中。封六鄉政乘於本莊。岩城吉隆於龜田。既而佐竹義宣子義隆。割予其地二萬石於次子義長。曰秋田新田。後改岩崎。明治元年。分出羽為二州。曰羽前羽後。陞矢島邑主生駒親敬秩列藩翰。四年。改藩為縣。尋置本縣。令併其地。加以陸中一郡。本縣勸業事務。初置生產掛於租

稅部掌之。八年太政官命改府縣職制。因屬之第二課。明年分其職為四科。曰勸農。曰勸工。曰勸商。曰庶務。十一年六月。選老農四十五人。為勸業掛。散居各區。以通信息。十二月改第二課。稱勸業課。分為農事。牧畜。報告庶務四科。農事掌墾田。治穀。蠶桑。植物。漁業等事。牧畜掌牧場。及牛馬蕃息等事。報告掌農事。通信。及造輸出輸入比較表。物產表等事。庶務掌礦山。機織。諸會社。及博覽會等事。十二年從縣會議。委勸業通信於郡署。每郡用老農數人為吏員。編成年

報月報。以頒布諸府縣。十四年九月十七日。車駕省方。臨本廳。縣令石田英吉奏為政概要。

勸農

管内水田種稻。歲收米百餘萬石。以舊秋田藩封邑居多。稱秋田米。而其質粗惡。視之他方。為最下等。價亦隨賤。今推所由來。蓋秋收之際。陰雨累日。不得乾曝。苞藏踰歲。黴氣蒸發。頓變色味。黯如土塊。狀類麩。土俗目為柳差米。如平鹿雄勝仙北三郡。則山嶽四圍。風氣閉塞。春雪遲融。秋霜早降。比較他郡。耕種

時日少三旬許。收穫後期。輒遭雨雪。不特此也。其初刈稻結束。植棧畦畔。成井字形。倒懸所束。上稈下穗。經數日。移之宅地。層層堆積。成團壩形。每堆五六千束。若一萬束。蘊蒸臭腐。職此之由。藩吏嘗欲革之。未果而藩廢。明治十一年。本縣申請內務省。派遣勸農吏。設試驗場於仙北郡金澤西根邨。平鹿郡角間川邨。雄勝郡郡山邨等處。凡百六十九町九段三畝十三步。以攻治其米。名曰米質改良法。其方設大小笕架。先懸束稻於小架數日。待稻稈稍乾。移之大架。曝

燥又數日而後藏諸廬舍。是為第一著手。十二年復申請內務省。用其勸農局金千五百圓。充稻架費。因命老農。就平鹿雄勝仙北三郡。擇地百九十八町九段五畝二步。以行前法。是為第二著手。十三年復請得勸農局金千五百圓。就前三郡及北秋田郡。擇地二百五十町。以行前法。雖秋收遭霖雨。不復腐敗。販之他方。其價增什之三四。是為第三著手。既而角間川民相議。集貲造笕架。乾曝藏貯革舊法。名曰秋田改良社。隣郡各地亦欲效之。而民貧不能辦費用。因

循仍舊勢有不得已者。縣吏百方經畫。謀第四著手云。

植物試驗場。明治九年設之。秋田郡八橋邨。培養內外植物。其圃一町七段餘。十年加以水田二段八畝。移栽管內各地及他府縣良稻。至秋成。開種子交換會。後爲永例。自是歲至十四年。本場所集菓禾蔬菜五百餘種。而稻則四百五十種。品第其性質佳惡。栽培難易。收穫多寡。使衆人縱覽。有乞種子者。輒予之。初以本場褊狹。不能容庶物。且所栽各異土宜。遍設

之各郡。又諭人民所在開設。凡三十餘所。曰自由試驗場。後增至五十所。蓋民設功用。優於官設。於是悉廢郡署所設。改稱本場曰育種場。多栽菓禾蔬菜。應民請以給其種子。若夫種子交換會。則召集自由試驗場委員及諸老農事者。於八橋邨第一勸業場。各致其所栽種子。每種分莖根皮葉花實六部。付注釋揭示場中。以供閱覽。而交換順序。則會頭先檢所得種子。使書手錄其種名及人名。付之會員。會員論定其品位性質。及培養土宜。會畢。從所請交付焉。

邦製糖霜。盛於西南諸州。而皆用甘蔗。本縣移栽。不適土宜。以氣候寒暄異其度也。近者外舶齋來蘆粟。能耐寒氣。縣民間有栽養者。而未曉製糖方。明治十三年。以南秋田郡中野邨地六段為試驗場。徵製糖師於高知縣。傳習其方。十四年設第六勸業場於同郡大久保邨。廣百餘町。移蘆粟試驗場於此。製藍亦盛於南海。而本縣產藍草。歲收八九十萬斤。製造粗惡。市價隨賤。乃徵製藍師於德島縣。傳習其方。擇大久邨勸業場內地四段。種藍草。試其栽培法。

管內官地。荒蕪未墾闢者。八百八十九町一段六畝二十二步。其墾闢為田圃者。在南秋田郡諸邨。得五十四町七段二十六步。在河邊郡諸邨。得二百六十三町七畝。在仙北郡北檜岡邨。得六十二町九段一畝十六步。其民田通計九郡。得二千五百七十六町五段二十四步。而山林屬官有者。中興以後無厲禁。斬伐殆盡。今栽樹苗以圖滋殖。

牧畜

牧畜創於舊秋田藩時。初天保中。藩主捐貲飼馬。授

業窮民累歲蕃息。稍有贏利。後遭凶荒。病斃相踵。種類殆絕。郡吏相議。釀金索種他方。更開牧場。其在仙北郡田澤邨小和瀨野者。有馬百七十餘匹。明治初罹兵燹。經六七歲。未復舊業。既而本縣置勸業科。以管理之。大設獎勵法。或貸資本。或付馬種。管內九郡開馬市四十九所。每歲自五月至十一月。集各地所產駒。經二歲者。賣買大約一日七八十匹。至百匹。收價額百分之四。以爲馬主共有資本。其收支決於畜產協議委員。十三年蕃息至一萬匹。其直金三十五

萬圓。蓋管內牧場四。北秋田郡有早口邨平瀧臺。大葛邨長部澤。仙北郡有田澤邨小和瀨野。平鹿郡有大松川白瀧。通計八萬二千餘匹。牧牛近歲所創。僅有二千六百餘頭。然以蕃息甚易。贏利甚多。有爭趨其業者。

牧畜試驗場。明治十二年所創開。在南秋田郡八橋寺內二邨。距縣廳十八町。其地南沿貢川。北限青森官道。東西丘陵。綠草繁茂。不止宜牧畜。亦宜游觀。場中所飼。洋種牛馬牝牡七匹。雜種綿羊牝牡十五頭。



係本縣所購。及勸業局所貸。十四年洋牛生犢七頭。其與邦種牝牛交者。生犢若干頭。洋馬與邦種牝馬交者。生駒七匹。並寄養民家。又用官金一萬圓。購良馬於巖手青森二縣。亦寄養民家。嚴立規約。以圖蕃息。綿羊質弱。動輒死亡。今健全無疾。生子九頭。足以見茲土宜牧畜也。

蠶織

蠶桑之業。所由來舊矣。文政中。秋田藩士有金秀興者。任度支。開拓荒蕪。栽桑飼蠶。建官署。置吏員。謂之

養蠶方。因聘善蠶桑者於米澤。購桑苗三萬本。栽之貢川兩涯。及河邊郡百三段。新屋邨等處。居數歲。其業大興。施及秋田仙北平鹿雄勝諸郡。荒陬僻境。亦莫不養蠶。天保中。饑饉相踵。散貲救窮。漸致衰廢。秀興子秀安克繼父志。督勵吏民。復舊業。重修其蠶室。在秋田郡川尻邨。橫瀨邨。仙北郡荒川邨。檜木內邨。者。專製生絲。明治中。興貿易漸盛。乃輸之橫濱。多獲贏利。九年。本縣申請內務省。建蠶室於百三段。新屋邨。有桑田八町。以供其用。募管內八郡男女若

千人。習繅法及養蠶法。十年增築蠶室。試養野蠶。十一年使女生徒習製繅法。又養秋蠶。十二年分男女生徒等級。試其業。十四年應秋成社請。派遣卒業生善蠶桑者。秋成社事具附錄。

販蠶連於海外。自明治元年始。五年頒布蠶種製造規則。置大總代及世話役。以檢其精粗。八年更設條例。併諸夥。稱六德組。置頭取一員。十年更分為數夥。南秋田郡川尻組。秋田町。土崎港町。河邊郡百三段新屋邨。為川尻組。山本郡為秀安組。由利郡為本莊

組。他如河邊仙北平鹿雄勝四郡諸組。各冠以其郡名。而南秋田郡又有川尻別組。松本組。瀧湖組。通計各組。歲製蠶連三萬五千紙。送致橫濱。販之海外。而川尻組所製。特為外人所喜。

生絲之產。雄勝郡為最多。而平鹿仙北二郡次之。如南北秋田由利河邊山本角鹿諸郡。專製蠶連及繅絮。由利郡矢島町。有製絲機塲。名康濟義社。士族所業。凡諸郡所製生絲。七千二百貫。供管內機塲。而其餘輸於海外。以貿易焉。

本土舊不產草棉。曩時秋田藩主購之上國。教民以機織。秋田織之名。漸著於世。又有橫手棉布。遍售於南部最上地方。明治初遭兵亂。其業頓衰。或欲復之。力不能辦。經費。加以洋布盛行。不果其志。九年三月。縣士三浦某。謀大開機場織紬絹。以資士族生計。借得官金三千圓。從事其業。而貲本未贍。遂納之於官。乃增構其場。募男女若干人教習之。又遣人西京。精究其法。十三年有開織物會社於治下長者町者。而官場亦趨盛大。十四年有教習生四十餘員。工人二

百員。是歲從秋成社請賣予之。不欲奪民利也。土人多以分移桑苗為業。而近歲養蠶漸盛。不能遍給。購之福島巖手諸縣。運搬累日。栽培愆期。明治十年栽桑苗於南秋田郡川尻邨河邊郡百三段新屋邨。謀分移管內諸郡。規畫未定云。

礦坑

礦坑在東北諸州。以本縣為最。蓋崇山深谷。紫氣鬱勃。金穴銅府。所在有之。其從事採掘者七十一區。未經官許者六區。直隸於工部省者九區。舉其最盛者。

北秋田郡阿仁銅坑。雄勝郡院內銀坑。並屬官業。仙  
北郡荒川銅坑。角鹿郡尾去澤銅坑。並屬民業。而民  
業更盛於官業。尾去澤創於明治九年二月。獲生銅  
七十六萬六千三百五十九貫六百錢。煉得七萬千  
三百五十二貫五百錢。荒川創於十年六月。獲生銅  
十二萬七千二百八貫七百二十錢。煉得二萬四千  
八十六貫八百九十錢。

土瀝青。俗名臭土。寬政中。土人黑澤利八始知其功  
用。造油烟。歲久業廢。明治五年。其後嗣某復之。土脈

起南秋田郡槻木邨。連亘龍毛岩瀨二邨。據近日概  
測。其容積大約三百五十萬立方尺。他如同郡脇本  
邨。及山本邨駒形邨。亦有墳起地上者。蓋歐米諸國。  
用此甃治道路。車馬不毀。霜雪不凍。十一年縣吏譯  
獨國舍密書係瀝青一節。付某試製法。近者陸軍省  
徵用其所製云。

石油多產於信遠越三州。本縣亦有之。其礦脈連亘  
山本由利南秋田三郡。近歲土人爭先採掘。至六十  
餘井之多。然大抵狡獪貪竒利。作輟無常。獨由利郡

小國邨。南秋田郡濁川邨。較有所得。惜製煉違法。火光不甚明。他鉛壙硫壙所在有之。寒風石產於牡鹿。七輪石產於浦田。砥石產於大葛及三内。皆可以資國用。但僻境荒陬。特病運輸。議者竊有望於開道路。便舟車焉。

漁業

本土帶河瀕海。多產魚介。其漁場推山本郡八森岩館。及秋田郡船川北浦為最。其魚鯧鮪鯨居多。兩郡所獲。歲得金十五六萬圓。而由利河邊二郡亦次之。

八森產鯨魚最多。其地瀕海。居民六百戶。歲製胴鯨及鯨油鯨粕一萬四五千石。其直不下八九萬圓。鮪魚他州所無。故又稱秋田魚。多產於八森及南秋田郡牡鹿島南北兩岸。輸於上國。以糞綿田。歲得五六萬圓。鯧魚沿海無處不產。販鬻極廣。山邨僻境供膳食。其餘糞田畝。或榨取燈油。又有鮭鱒。網獲於貢川能代川子吉川。歲得三萬圓。鯉鮒鯔鰻等雜魚。產於八龍湖。湖濱民業兼耕漁。亦得三萬圓。據明治十三年計表。管内漁利。所納稅者。原價六萬九千百九十

五圓。他屬漏稅。不詳其數。蓋細民貪近利。不顧後害。數罟密網。不留纖鱗。因設條例。漁具守制。如漁民戶口。網罟數目。有別表在焉。

物貨

土產物貨多品目。有司欲登錄作表。民疑其增稅。輒隱蔽之。難得實數。且分爲常產特產兩種。常產首推稻麥。特產推麻繭生絲藍草。而諸品又有天造人造之別。明治十年開博覽會於縣治土手谷地町博物館。十一年擬內國勸業博覽會。以築南北本館。及農

業館。美術館。博物館。於八橋邨植物園。其南北館排列礦材陶器漆器銅器絹帛。十三年開第三期會。更造會場。所陳物貨。凡一萬千八百三十三種。其千六十五種爲天造物。一萬七百四十二種爲人造物。而又有機器二十六事。今就人造物中。特舉漆器。所謂春慶塗者。製於山本郡能代町。北秋田郡大館町。仙北郡角館町。其衣箱茶棚什器。製於南秋田郡秋田町。其描金製於雄勝郡大館川連三梨等處。而能代製有飯臺架棚盃盒糖盆文房諸具。致之海外博覽

會得賞牌。大館所造。率皆日用家具。堅緻耐久。但工人拘守舊套。不解新製。販鬻未遍。因示樣式。以獎勸之。蓋本縣與他方。有無貿易。仰給海運。而初冬雪降。至明春雪融。風濤險惡。不見帆影。其船舶來往。一歲止七閱月。據去秋所造計表。其半歲出口貨船。一千九百四十五隻。其價九十一萬二千八百四十五圓。入口貨船。二千二十隻。其價七十五萬六千三百四十四圓。

學校

本縣習俗鄙陋。間有校舍。不過授讀習字。明治五年頒布學制。事不果行。六年開小學傳習學校。民始知向學。是歲所開公私立學。凡七十二。至八年有三百三十三。九年三百五十。十年三百八十。十一年四百十四。十二年四百五十。十三年增至五百零三。足以見教化之進步矣。頃者設學校監理。就學督責法。生徒面目將不久而一變。

師範校。初稱小學傳習學校。明治六年所置。在秋田東根小屋町。學制始頒。難於施行。先斟酌其諸科。設

陸續雜錄 卷七  
教則。尋召集管內學者。選補教員。授以小學卒業假  
證狀。七年創築校舍。名太平學校。更定教則。以八閱  
月為修學期。初本縣別有洋校。以習英書。至是併之  
本校。為置洋學一科。八年設上等小學科。選下等卒  
業生授之。更正教則及學期。九年八月廢洋學科。置  
變則中學科。改教授法。十月設女子師範傳習科。十  
年本校災。書籍什具皆燬。假置教場於秋田病院。更  
築校舍。明年竣功。稱秋田師範校。設師範正科。尋改  
中學科。為中學師範豫備科。更革校規教則。十三年

五月築女子師範校。成。於是男女兩學並立。生徒益  
進。十四年六月。本校復災。今謀重建。

女子師範校。在秋田西根小屋町。十三年所建。先是  
七年五月。授女生徒以小學傳習法。至九年十二月。  
更募集之。十年二月。分傳習科。為甲乙二部。每歲徵  
集生徒若干人。十四年校舍新成。縣令臨行開校儀。  
定職制章程。增訂校則。及附屬小學教則。  
據是歲各郡學校及生徒統計表。公立四百六十三。  
其生徒男二萬八千四百二十二。女二千八百六



十七人。私立四十。其生徒男千九百四十四人。女二百八人。師範學教員二十二人。中有米國人一員。其生徒小學師範科八十四人。中學師範豫備科六十人。附屬小學上下等二百二十一人。女子師範校教員十三人。其生徒師範科五十人。附屬小學上下等一百七人。

病院

公立秋田病院。創置於明治五年。初土俗庸陋醫最甚。管內業刁圭者五百餘人。皆主漢方。一無可取。至

是設本院。醫師數人主洋方。就譯書講治術。七年廢本院。更置之於上手長町。以縣稅及富豪義捐充其費。八年一月。改稱醫校。而病院屬焉。召醫生試業。拔其優者三十餘人。傳習洋方。及卒業授以假證狀。八月。創築本校於東根小屋町。募集生徒。十二月廢醫校。復置秋田病院。隸以醫學局。十一年以嚮授證狀者。為附屬醫員。散居各大區。專主治療。十三年五月。擢全科卒業受內務省證狀者十六人。入本院。實驗其業。使之遍施治術。十二月欲增築屋宇。盛養生徒。

用金五千六百餘圓。以購院傍地三千三百九十坪。現今在院生徒二十六人。病者男百五十七人。女六十五人。其在他方旦夕來往受治者。男二千七百四十六人。女千二百二十人。通計四千八百八十八人。管內私立病院。在北秋田郡者二。在南秋田郡由利郡平鹿郡者各一。各郡罹傳染病者。腸室扶斯。實布的里亞男女合六十八人。其癒者四十四人。死者十五人。未癒者九人。通計死於他症者。九千四百九十二人。而係內神經病。及消化器諸病者居多。

秋成社 附

秋成社。本縣士民所設。專業墾田蠶織。初明治十年。有謀興議會。以張民權。殖民產者。會官廢士族廩餼。以金代之。名曰金祿。欲使其力食各就產業也。於是士民三十餘人。連署上書縣廳。及內務省。請借勸業資金。未報。十一年來舉羽生氏熟為總代。稟請內務省。而氏熟縣吏不得離任。乃用山田純。山縣賴康代之。至東京會大久保內務卿遇害。不果所請。既而內務省問其開

墾方法。乃上書答之。十二年八月。許貸金五萬圓。約經五歲後。加利子三分。每歲折納。經十歲償完。而官地除道路溝渠外。皆貸付以開墾焉。經十五歲後。償其價。又每歲六月及十二月。具申資金收支詳目。於是氏熟爲社長。瀨川安五。瀨川德助。掌倉廩。以秋田神社廊廡。充事務所。九月。納公債證書於縣廳。請借金。許之。是月爲社員設救恤規則。及義倉規則。每員日貯錢一釐。以備之。十一月。移本社於手形堀端町。羽生

氏農學所。十三年一月。佐佐木議官巡方。因具陳情實。二月。具狀再請。未報。四月。內務省交付五萬圓。乃償還前日縣廳所貸金。七月。社長氏熟至東京。借得一萬圓。其償還效前約。乃充牧畜資。十四年五月。縣廳貸付機業資二萬五千圓。六月。置義倉於社側。附以白田三段二畝。十一步。栽桐苗。現今本社貯畜。除社員釀金外。別有稻米三百二十苞。又有瀨川安五。瀨川德助。寄付稻粟五百苞。氏熟寄付金十圓。其墾地曰

將軍野。曰大張野。他有蠶場機場。列於左。

羽後州南秋田郡寺內邨。有官地。曰將軍野。廣三十九町八段五畝二十六步。明治十二年請於縣廳借之。畫為十二區。丘陵連亘。土多軟沙。宜栽桑樹。又距本社里許。尤便來往。乃封畛設堰。擬開一大桑圃。雜栽以甘藷馬鈴薯。十三年一月。雪車載致秋田市街糞芥諸物。一萬餘兩。併海藻敗魚。以充糞培。但地近大海。疾風時起。其栽桑。每株相距一丈二尺。樹下芟草方四尺。

蘊崇為根基。四月購桑苗三萬株於巖手縣。栽之。為嚴霜所傷。十存三四。尋築圃廠。置看守。養馬匹。是歲暴風不害桑樹。今有六千七百四十三株。

大張野在河邊郡。廣二百六十一町五段三畝二十步。明治十三年五月。請於縣廳借之。分為南北二區。南區自寒水澤至雄島澤。約二十町。北區自大鱒澤至小鱒澤。約三十町。並是陸田。移社員五十戶。有頭目三人。掌造舍開圃等事。

十月農業師龍田退藏。至自東京。教以馴養牛馬。運用耕具等事。十二月置農校。募生徒。傳習農學諸科。借馬耕機器於官。時有田馬十六匹。田牛十頭。及牧牛八十頭。十四年一月設小學。以教子弟。四月興徒墾闢。至六月得田五十町餘。栽旱稻六段。燕麥四段。蘆粟七町。桑二十四町。大豆十八町。分付各戶。以培養焉。是歲製糖師牧野次郎吉。至自東京。教以製糖法。及蘆粟栽培法。初文政中。秋田藩開拓荒蕪。遭凶歉不

果。其地南北二里餘。而大張野邨山内邨。沿溪築堤。以開水田。本社以其多費少利。改為陸田。以社員無產者充佃戶。五人為一夥。置夥長一員。授以屋宇。現今有八夥四十八人。分居南北。每戶授地十段。半栽桑樹。半為圃場。歲給金三十六圓。夥長倍之。又貸付五圓。充農具費。有所雇使。別給其直。蓋異日墾闢竣功。佃戶與助資股主。分受其地。為永業云。其農校付以荒地三十町。設教則分二科。耕種為本科。講讀為豫科。

附錄  
兼學二科曰生徒。單學一科曰參學生。分學費為三種。曰社費。曰貸費。曰自費。其社費生卒業。分擔本社墾田事業。貸費生或參社務。不必責報效。自費生去就任意。若有所請。而參社務。亦準貸費生。本校屬地開墾耕種養畜等。教師命生徒各執其業。出納庶務。貸費生兼掌。而社長兼任校長。

養蠶場在河邊郡百三段新屋邨。舊為官業。明治十二年。本社請於縣廳。借其屋宇器具。及桑

圃二町九段四畝八步。約以五歲為期。歲納金百五十五圓。明年分付桑葉於社員二十二戶。養蠶專製生絲。十四年二月。又借屋宇器具。及桑圃二町九段十九畝。亦期五歲。圃一町。歲納二十五圓。別納百圓。充屋稅器稅。合算前圃。廣五町八段四畝二十七步。乃置頭目幹事。使社員堪力役者。移居以從事耕耘。五月分蠶室為七局。每局設部長一員。而生徒二員。雇役若干員屬焉。八月試養蠶生徒業。大抵婦女歲自十

三至二十五。及第者四等八人。五等四人。六等二人。各賞物有差。本場主製絲。其蠶連給社用。及社員自用。他不許多造。是歲用蠶連二十紙。飼養生卵。製九百十紙。洋商欲購求之。不售。蓋守社規也。

紡織場。亦舊屬官業。明治十四年五月。請縣廳斥賣。乃納其價。屋舍價金三百五十圓。機器六百六十圓。四錢四釐。準備什器三百五十八圓。三十八錢九釐。需用品百六十一圓八十八錢。

七釐。營業品一萬七百六十二圓六十二錢九釐。通計三萬五百九十七圓九十四錢六釐。於是移場於本社。置場長一員。總管諸事。別設染工所於龜町西土手町。有機器八十八事。職工百四十三人。使職司九人督其業。又設發賣所。蓋本場所製諸品。合算其經費與資本利息。是為原價。送付諸品於發賣所。經九旬則納原價於本場。以為例規。

據本社統計表。社員四百四十四人。其二十六

人為職員。有社長。場長。加談役。出納掛。庶務掛。等名目。資本十六萬四千二百十七圓。其三萬八千五百五十圓為分股資。六萬圓借於內務省。二萬五千圓借於本縣。其餘係貸借及寄托諸種。分賦諸業。各有定額。其他載前條外。又有仙北郡檜岡邨下野六十二町九段一畝十六步。河邊郡仁井田邨新中島二十四町六段三畝二十七步。通計三百九十四町八段五步。其墾闢者有九十五町八段廿四畝。又紡織場有秋

田織八丈織等四千九百五十二端。養蠶場有蠶連殼繭繡絮生絲等。

川尻組

附

川尻組。組即團結也。公會也。明治十年一月。秋田郡川尻邨。秋田町土崎湊町河邊郡百三段新屋邨士民相團結。以精選蠶種。輸之海外。十一年五月。官廢蠶種製造組合條例。仍稱川尻組。置事務所於川尻邨。有頭取一人。檢查員四人。勘定方兼書記一人。十二月遣語學生大橋



淡川邨恒藏於伊國。學其語。以便貿易事。十二年二月。請於紙幣寮。造商標。以防奸偽。七月大隈大藏卿與英國人邊捏西氏來觀。十二月間伊國王族熱納華氏至東京。遣人贈蠶連十二紙。繭若干種。及桑圃圖。熱納華氏稱為良品。是歲創本會蓄積法。十三年謀輸蠶連於海外。頭取川邨永之助至伊國。與大橋淡偕從事販鬻。至明年五月還。十四年二月。改置頭取副頭取會計主任加談役檢查員。按本會報告書。製蠶

連有三難。飼養不失其氣候。發育不誤其健全。一難也。檢化蛾之強弱。察卵質之良惡。二難也。料販鬻之緩急。得價額之確當。三難也。然飼養製種。皆在於我。未足以為難。獨販鬻一事。不得不與外人較長短。而外人長於射利。實為至難。橫濱開市以來。一歲輸出多則二百萬。少亦不下五六十萬。信濃及米澤所產。大獲聲價。居數歲一起一仆。動致折閱。亡產破家者。往往有之。而原其所由來。在於坐待彼來買。與不精選蠶

種本會痛革舊弊。加意選種。直輸海外。將欲漸復聲價。益擴販路。顧人情貪利惡勞。苟不嚴設規約。以防奸偽。安得成功。因定規則十三項。一曰。春秋開會。議事務。而職員公選於春會。二曰。分植桑與飼蠶為二途。各異所掌。而採桑葉必擇其地。三曰。預定費額。隨所製蠶連多寡賦之。四曰。販蠶連歲貯其價額百分之一。放債收息。以備凶歉。五曰。有圃一段。摘得桑葉二百貫者為一股。授以股券。其未盈數者。付之假券。六曰。

檢蠶種精粗。有不合格者。輒焚棄之。七曰。製蠶連直輸海外。勿歷牙僧。要使外人知為良種。八曰。遣生徒二人於伊國。專修語學。旁巡州郡。以廣販路。九曰。生徒以三年為期。交番派遣。各修語學。兼致力販賣。十曰。蠶時派遣生徒。巡視各地。未熟於法者。教之。若所教不效。輒償其價。十一曰。蠶連繭子。舶裝失法。發生誤期者。痛加改正。務從良法。十二曰。生徒駐在外國者。電報蠶連解額於本會。得復書。然後結約收價。交付本

色。十三日。生徒卒業。歸則開校傳習之於會員子弟。十三年輸蠶連於伊國。果得聲價。不違所逆料云。本會職員。頭取一人。副頭取一人。會計主任一人。加談役四人。檢查員三人。製造工百四十二人。通計百五十二人。所造蠶連輸於海外者。十一年有二萬三千八百五十一紙。其價金五萬三千四百五十圓零九錢。十二年一萬七千八百三十一紙。價四萬二千二百九十四圓三十錢四釐。十三年一萬八千六百零四

紙。價八萬四千零九十圓零八錢。十四年二萬三千七百八十三紙。價金未定。

感恩講

文政十二年三月。秋田藩辨事商人那波祐生等。創設感恩講。以賑恤鰥寡孤獨。祐生稱三郎右衛門。家以織絹為業。慈惠篤實。為鄉里所推重。先是市尹橋本某問以保嬰法。祐生夙有恤窮志。乃對曰。不必止保嬰。并賑窮民。某願先捐金百五十兩。又折納二百五十兩於官。買收官

祿以充其資。官祿所謂知行高者。知行米地也。高猶曰收額也。某許之。居無何。田中伊織代爲市尹。祐生又說以方畧。且曰。此事至難。非祐生一人所能辦也。請與他有力者謀之。凡百事委祐生。勿問細目。伊織許之。乃與其友鹽谷善兵衛謀。拮据周旋。得同志七十二人。各捐金五兩至三十兩。而祐生更捐三十兩。與所前捐合。得金千兩銀十貫目。於是置年番七人。祐生爲頭取。乃上書市尹曰。凡治下窮民。官賑恤之。頻年穀

價騰貴。生業漸衰。乃擁貲產不救。殊背天理。今某等協力。集金銀若干。欲以補官惠所未給。請特許斥賣墾地爲貲本。其歲入半賑窮乏。半爲蓄積。傳之永久。使衆庶感戴主恩。名此會爲感恩講。藩制凡田租收什六。而墾闢荒地者。不問士農工商。免租數歲。及爲熟田。則丈量定租額。收什三。士族墾地。謂之判紙外高。在農工商。謂之辛勞免高。祐生所請墾地。卽是也。市尹以聞。藩主佐竹義厚嘉納焉。遠邇聞風。同盟者一百

九十人。集得金三千兩銀十貫目。買收官祿二百三十石。冬十一月。市尹賞其功。賜重餅乾鮑。後爲永例。會員又釀錢各二貫文。合得三百八十二貫文。買收官祿七石。供紙筆費。市尹亦授六石助之。是歲五穀不登。米價騰貴。窮民請賑恤。而本會方務儲蓄。未可輒散財。祐生與年番議。各捐金九兩以救之。市尹亦予米八苞助之。因設救恤規則。有告鰥寡孤獨癡疾。及窮乏者。詳問其事情。一口給米三合。七歲以下一合五

勺。自三十日至五十日有差。其老耄疲癯者。加以衣服薪炭。其職業亡貲本者。授以器具。凡受救恤者。要竭力產業。若懶惰放逸。自速饑渴者。不復賑救。會員捐金。雖有事故。不求償還。凡金穀出納。歲終清算示衆。年番雖歷數歲。不受俸給。至誠執事。莫或懈怠。天保元年三月廿一日。正當去歲創會受官賞之時。乃奏神樂於矢橋邨山王祠以慶之。藩主賜以酒食。其後市尹授錢一萬貫文。年番相議謂。今受官錢。他日官欲

借本會所貯。何以辭之。本會主旨在義捐相救。與官無涉。遂辭不受。是秋本願寺僧至此地。傳寺主命。贈其法財二百四十五貫文。二年市尹貸付錢七十貫文。曰。償還不問遲速。且不要利。子年番相議謂。去歲不受賜錢。今復辭之。跡涉不敬。且曰。貸付則非賜也。乃借其三千貫文。是冬築倉二字於本町第六坊。市尹寄付屋瓦門材。商戶每坊贈錢五十貫文。若三千貫文。又有贈木石者。其貧者力役助工。日數百人。初算經

費一萬貫文。及告竣。僅用五千貫文。以得衆助也。三年祐生請得曾寄市尹金四百兩。及利子。買收官祿六十石。四年官賜俸於年番。命以豫備倉穀充之。僉曰。本會所貯。一粒一撮。皆係義捐。安得自取。固辭不許。乃更納金。買收官祿補之。是歲又不登。民大困。乃發倉賑之。又養孤兒百二十人。有病不能來者。就給湯藥。以故治下不見餓莩。民免流亡。八年九月。祐生建議。欲擴賑救法於他郡。未果而歿。子祐章繼遺業。於是

本會所有官祿三百八十一石。倉米五十石。通計四百三十一石。祐章以為未贍。具申於官。欲使義捐二十兩以上者。身及其子得著袴。三十兩以上著上下衣。蓋藩制不許庶人著袴若上下衣。及藩主納祐章議。布令治下。捐貲者百二十五人。集得千四百一十一兩。安政四年築會所一字。祐章捐貲辦其經費。先是祐生歲納百金於藩。以充軍資。既而買收官祿三百四十一石。以其入代之。及中興廢藩。所納軍資與本

會所貯。合得官祿九百一十一石。及稻種千九百四十石。明治六年。本縣權令國司仙吉。七等出仕島田泰夫。連署上書大藏省曰。近者頒令停給士祿。舊秋田藩所給名辛勞免者。悉皆停罷。獨感恩講所有仍舊不改。以其義捐金所買收主賑窮也。然據例格。亦不得不停。伏請天恩特代之以金。賜二萬圓於本會。二千圓於土崎湊町講會。永蒙其澤。初土崎湊町有邨上某者。做祐生。與同志百六十二人。聚貲買收廩

陸奥縣志 卷一  
三〇  
祿五十石。墾田祿二十五石。以資賑恤。亦稱感  
恩講。故并及也。七年大藏省授金六千圓。諭以  
釐革舊法。殖物產。資民業。於是本會得其五千  
五百四十三圓八十九錢。土崎得其四百五十  
六圓十錢五釐。九年祐章歿。子祐富嗣。十二年  
以所賜金買田十一町二段一畝四步。歲收米  
二百七十二石。買公債證書三千三百九十圓。  
歲收其息二百三十七圓三十錢。視往年所收  
減其半。而窮民求賑恤者益多。十三年祐富與

吉川總右衛門至東京。上書大藏省。陳其情。土  
崎講會亦同之。十四年省議酌量其情狀。特賜  
金五萬三千三百五十二圓七十四錢。乃付其  
四萬九千二百九十六圓九十九錢於本會。其  
四千五十五圓七十四錢二釐於土崎。自祐生  
以文政二年始開本會。至明治十三年。歷五十  
三年。受賑救者二百四十萬四千餘人。施米七  
千十四石。金六百十五圓。本會所有。田十一町  
二段餘。金五萬三千六百七十圓。米千八百九



十六石。而那波氏祖孫三世所捐金七千九百圓。所買收官祿三百四十一石。可謂多矣。那波武弁。世居播磨。祐生七世祖祐惠。天正中避亂本州。那波浦。因氏焉。祐惠混跡商賈。富累巨萬。其子春幸。從佐竹侯於京師。納貲助用度。及孫移封秋田。春幸子祐祥。亦隨移之。祐生其曾孫也。祐生有心計。以茲土多桑。欲養蠶織絹。文化十二年。借金藩吏。以招織工於上野。陸奧。并購機器。大興其業。而織法亦出新意。販之都會。頗得聲價。十三年。藩置織絹役。所用祐生為支配人。明年。賞勞。算封內所產生絲價額。每金百兩。課稅一步。以賜之。後為永例。先是。有司禁民售管絲。撲買占利。得不償失。又令士民衣服悉用土產。事不果行。文政二年。藩吏金秀興。掌財政。祐生說以解法。禁招商賈。植桑樹等事。秀興納其言。使其主紡織諸業。不問出入。秋田織之名。

稍著。天保六年。幕府行新法。凡士民不得衣帛。於是織業頓衰。弘化二年。藩吏委祐生子祐章。以蠶織事。乃派人諸州。學龜綾。紹紗。縮緬等織。法三年。祐章償還所借資本於藩吏。明治五年。官諭祐章。致畝織綾。各一匹。於外國博覽會。十年。祐章子祐富。致白羽二重。於內國博覽會。得花紋賞牌。



